

COMUNICATO n. 3332 del 28/11/2024

Traduzione in cimbri

Trentinar vorsitzarung vo Arge Alp, auzgemacht bia vürzogiana

[Cimbri] Änemmente atz 25 von vorgännate bimment di vorsitzarung vo Arge Alp in vuaz von Kanton Tessin, da autonome Provintz vo Tria mocht est nidarleng in programm un vürvüarn di istituzionäl sachandarn boda ägian dar arbar Kamöuschaft von alpinar redjogen, ditza sin azta di vorsitzarung bart khemmen abegètt in Lant Vorarlberg, vorgelekk in okasiong vodar 56[^] Konferénts von Schaffar von Góvèrne bodase bart haltn ka Tria auz di lestn von bimmat von djar 2025. Pittnan provediment ägenump atz 22 von bintmānat vügelekk von vorsitzar Maurizio Fugatti, da provintziäl Djunta hatt nidargelekk baz 'z mochte khemmen getānt auz pa disan djar boda iz khent zuargètt di vorsitzarung, daz earst vo alln untarlegantese vürzovüara in tēma "Djunge un pèrng: prodjèkte zo leba, zo arbata, auzolega arbat. Esperientzan un bia zo halta hert".

"In dise zaitn boda soinn drā zo bëksla vil sachandarn in di lentar von alpinar raum, saiz vor bazta ägeat dar umbèlt saiz vor bazta ägeat in laüt, bölbär gem vèrt in prodjèkte vo berda lebet in di lentar von pèrng un zornìrt di pèrng, ombrómm höarn un vorstian di esperientzan von ändarn mage o helvan zo "lokha" di djungen zo leba afte pèrng" asó hatta khött dar Fugatti, mechante ke dar koordinamént von Trentino aftz sött sbere problēme un boda soinn gelaich vor di ändarn redjongen vo Arge Alp o, boda hām khennzaichen boden gelaichan, mage helvan zo tüana guatz vor di lentar.

Sidar 'z djar 1972 da autonome Provintz vo Tria iz toal vo Arge Alp, an arbat Kamöuschaft von Alpinar Redjongen boda hatt 'z zil zo helva auzzomacha di problēme boda soinn gelaich in mearare redjongen von alpinar raum helvantase ummaz pinn andar. Häüt soinda toal vo Arge Alp di Lander Vorarlberg, Tiról un Salzburg (Österrach); dar Frai Staat vodar Baviara (Taütschlānt); di autonome Provintzan vo Tria un Poatzan un di Redjong Lombardia (Baleschlānt); di Kantöü Graubünden, Sakt Gallen un Tessin (Svaitz). Asó azpe da schafft dar Statütt vodar kamöuschaft, di toalnemmar vo Arge Alp nemmen ā di vorsitzarung aniahlaz vor a djar nā in alfabèt ordnung.

Pittar delibera ägenump atz 22 von bintmānat di Djunta, darzuar in tēma vodar trentinar vorsitzarung, hatt geschafft in Dianst vor di Zungmindarhaitn un auzantn sachandarn zo tüana allz bazta ägeat dar organizatziong auz pan djar; dar Dianst sèlbart bart machan in programm, bart herrichtn di trèff von vorsitzarung Amt, vodar Konferénts von schaffar von govèrno, von direktif Komitätt, von khnopf vor di öffentleschen relatziongen, von khnöpf prodjèkte, von Praiz Arge Alp 2025 un vo alle di ändarn istituzionäl sachandarn boda bartn khemmen getānt vodase vür sin in bimmat von djar 2025.

Vor bazta ägeat informatziong un komunikatziong, dar provedimént schafft in vüarar von Prèss Amt vodar Provintz nāzostiana allz in sèll boda iz zo tüana vor ditza, nā in plān vor di komunikatziong von djar vodar vorsitzarung, legantese pittnādar pinn Khnopf von öffentlechen relatziongen vo Arge Alp.

Übersetzt von Schaltarle vor di zung von Toalkamou vodar Zimbar Hoachebene

(cdt)